



Ouerbetrokkenheid by die katekisasie

Elke Gereformeerde ouer belof by die doopvont, met die hele gemeente as getuie, dat hy sy kind in die Gereformeerde leer sal onderrig en ook sal laat onderrig.

Die woord 'en' beteken nie dat wanneer ouers hulle kinders laat onderrig, dit as alternatief gestel word vir die onderrig deur die ouers self nie. Ouers bly verantwoordelik vir die onderrig, al word dit ook deur die kerk (via die katekisasie) onderneem. Om dié rede word dit van beide vader en moeder verwag en vereis om by die katekisasie betrokke te wees.

Gereelde bywoning

Om by die katekisasie betrek te wees, kom daarop neer dat ouers 'n aktiewe bydrae tot hierdie aspek van die opvoeding lewer. Dit is nie voldoende om maar net te sorg dat kinders die katekisasie gereeld weekliks bywoon nie. Bywoning van die klasse, sonder om deeglik voorbereid daar aan te kom, skep 'n tweeledige probleem:

1. omdat die katekisant nie op hoogte is van wat in die klas plaasvind nie, strem hy die gewenste gang van die lesaanbieding.
2. die katekisant wat swak of onvoorbereid die katekisasie bywoon, voel hom as gevolg daarvan ontuis, met die gevolg dat hy algaande 'n weersin daarin ontwikkel.

Dit is dus die heerlike taak van die ouer om toe te sien dat sy kind deeglik voorbereid die katekisasie bywoon. En dit hang van die onderrig van die ouer af in watter mate katekisante die volle voordeel uit die katekisasie kan trek.

Wanneer voorberei?

Wanneer moet hierdie onderrig plaasvind? Sondagoggend voor kerk? Nee, een of ander vaste tyd behoort elke weeksaand afgesonder te word wanneer ouers en kinders gesamentlik die katekisasieloes bespreek en bestudeer. Dit sal beslis inbreuk maak op die TV program, maar indien ouers van hierdie onderrig gebruik maak om werklik met hulle kinders te kommunikeer, sal dit vir beide ouers en kinders die kosbaarste oomblikke van die dag wees. Daar sal beslis meer na hierdie tydies uitgesien word (en dit sal bowe-al van meer waarde wees) as die beste program wat die kykkassie kan droom om te wees!

Veral wanneer u kind in die belydenisklas is, is hierdie tye wat daagliks vir voorbereiding afgesonder word, van die grootste belang. Die dooplidmaat staan dan op die drumpel van volle lidmaatskap. Wie kan hom beter leiding bied na die (vir hom onbekende) lewenservaring van volle lidmaatskap as sy ouers self, wat so lankal daarmee vertrou is? En dit mag die ouer waarskynlik self tot nadenke stem oor hoe hy sy lidmaatskap beleef, en reg daaraan laat geskied.

Ouers is opgewasse

So dikwels word katekisasie met die skool vergelyk, selfs daarmee gelykgestel. Dit is één rede waarom ouers, veral as hulle kinders groter word, hulle nie meer met katekisasieloes help nie.

Ouers weet dat hulle nie meer hulle graad 10-kind met vakke soos wiskunde of biologie kan help nie, gevolglik onttrek hulle hulle ook ten opsigte van katekisasie-onderrig. So 'n ingesteldheid is begryplik.

Dit is egter juis hier waar die een groot verskil tussen skool en katkisasie na vore tree. Ouers is nie altyd voldoende gespesialiseerd om hulle kinders in hulle akademiese skoolopleiding te help nie. Dit is egter heel anders gestel met die onderrig wat die katkisasie aanbied.

Op grond van die struktuur van die akademiese onderrig, word elke skoolvak minstens drie keer per week behandel, sodat leerlinge gereeld daarmee in aanraking kom. Daarenteen word die katkisasie slegs een keer per week aangebied, met die gevolg dat die kontak daarmee met lang tussenposes plaasvind. Ten spyte van die gereelde aandag wat op skool aan die vakke gegee word, vergeet die kind tog wat met hom behandel is. Daarom moet hy gereeld huiswerk kry – wat dikwels so gespesialiseerd is dat die ouer hom nie daarmee behulpsaam kan wees nie. Ten opsigte van die katkisasie is dit daarom die taak van die ouer om gedurende die week die katkisasielers daagliks met sy kind te behandel, om sodoende die onderrig in te skerp.

Opregte belangstelling

Betrokkenheid van die ouer behoort egter dieperliggend te wees as slegs die onderrig. Stel die ouer soveel belang in die katkisasie-onderrig as in die skoolonderrig? Vra vader en moeder na afloop van die katkisasie met werklike opregte belangstelling hoe dit in die klas gegaan het? Het u kind die vrymoedigheid om met entoesiasme te se: "Weet Pa en Ma dat daar 'n Rigter was wat links was?" Dan het daar iets besonder uit die katkisasielers na vore getree wat 'n hele bespreking op dreef bring.

Is u as ouer só betrokke by die katkisasie dat u kind dit wat hy daar geleer het, met u wil deel, daarvoor wil gesels? Indien dit wel die geval is, is u werklik by die katkisasielers van u kind betrek, en ontvang u die gedeeltelike beloning vir die onderrig waarmee u daagliks besig is.

CB Borst

© 2013

www.christelikebiblioteek.co.za